

Letradura “anter crepes e ciel”

Na dì dedichèda a la mendranzes al Festival te la Vallarsa

L'à inom “Tra le rocce e il cielo” l Festival endrezà da l'Accademia della Montagna del Trentin che dal 2009 en cà vegn endrezà te la Vallarsa entorn la fin de aost. Trei dis de scomenzadives, corsc, raides, spetàcoi e scontrèdes coi autores, che chest an se dejoujarà dai 29 de aost al prum de setember.

Da segnalèr en particolar l'é l fat che la sabeda 31 de aost é dedichèda a la mendranzes linguistiches, con doi momenc dediché a “la paroles del cher” en program te la ex scola Obra, l prum da les 9 da doman e l secondo da les 3 domesdì. En colaborazion con l concurs fodom “Mendranzes n poeja” e con l “Premio Ostana scritte in lingua madre” vegnarà rejonà de lengac e partegnuda te la lettradura de la mendranzes, e con desvalives

autores e esperc de linguistica, con la partezipazion anter i etres, per chel che vèrda l ladin, de Rut Bernardi, Fabio Chiocchetti, Leander Moroder e Daniela Templari.

L program se aur en jebia ai 29 da les 4 domesdì a la prejenza del president Alberto Pacher e de l'assessor Tiziano Mellarini tel Tendon Riva, olache da les 18.30 sarà la premiazion del concurs per videoclip sul lurier de l'om sa mont.

L moment clou del festival sarà en sabeda da les 9 da sera, con l concert de “Lou Dalfin”, feruscol grop musical de la valèdes ozitènes del Piemont (venjidor enche de la Targa Tenco per la ciantia en dialet del 2004) che à sapù atualisèr e viventèr i sons de la tradizion ozitèna.